

TEMPO SEMANAL

Husi Imiba Imi



Polisia nasional timor leate husi unidade task force halo hela seguridad besik embaixada australia wainhira timor oan sira halo manifestasaun kontra governu australia nia hahalok nebe la respeita soberania nasaun tl no kontra mos ezije atu pm australia husu deskulpa ba povu timor leste Photo TS

Tempo Semanal, 06/12/2013

Manifestantes Timor oan sira hakila katak nasaun bo'ot no riku hanesan Australia afinal nauk mos husi nasaun kiak sira inklui Timor Leste. Manifestantes sira hasai lia fuan kroak iha sira nia deklarasaun durante de manifestasaun iha embaixada Australia ninia oin iha Fatuhada iha lokraik (06/12/2013).

Povu Timor Leste hahu lakon fiar no amizade ho governu Australia hafoin kazu montazen ekipamentus hodi eskuta iha gabinete Primeiru Ministru no sala de Reuniaun ekipa negosiasaun husi TL antes de negosiasaun ba asuntus greater sun rise iha tinan 2004.

Nune'e governu Australia grava no rona lala'ok diskusaun preparatoriu ekipa negosiasaun Timor Leste hodi aijuda Canberra prepara taktika hodi foo souk ba ekipa Timor Leste.

Ho hahalok kuda hela ekipamentus eskuta ninian ne'ebe monta iha projeitu ida ne'ebe halo husi Ajencia de apoiu husi governu Australia ninian iha palaciu do governu hamosu deskonfianca ba uma sira ne'ebe harii husi governu Australia

liu husi programa bilateral, inklui uma sira ne'ebe halo husi governu xines hanesan Palacio presidencial, Ministeyru Negosiu Estranjeiru, Ministeyru de Defesa no Quartel jeral F-FDTL no konstrusaun sira seluk maka halo husi nasaun doadores sira.

Relasaun Timor Leste ho Australia hahu manas wainhira kazu leak Snowden ne'ebe foo sai iha jornal The Guardian relaciona ho gravasaun ba telefone ba leader sira iha nasaun sira iha asia pasifiku inklui timor Leste.

Relasaun Timor Leste ho Australia hetook manas liu tan wainhira iha Vikeke kraras povu Timor Leste celebra loron independencia ba dala tolu nolu resin walu maibe iha Canberra ASIO hetan lux verde husi Prokurador jeral Australia hodi halo invazaun ba edifiu defensor Timor Leste iha capital nasaun ne'e hodi rekolha dokumentus sira inklui halo kapturasaun no interrogasaun ba testamunia xafe ba julgamentu ne'ebe hala'o iha Den Haag. Hetook aat liu tan autoridade Australia ne'ebe mai hanorin povu Timor Leste kona ba respeita liberdade ema ninia ne'e priende tiha passaporte husi testamunia ne'e hodi hamosu deskonfianca katak Canberra lakohi husik testamunia ne'e ba iha den hag.

Nune'e hahu loron 5 no 6 fulan Dezembru Timor oan balun hahu halo manifestasaun kontra governu Australia iha embaixada Australia nia oin iha fatuhada Dili.

Iha Manifestasaun hodiseik loron 5/11/2013 PNTL hodi gas air mata defende fali governu Australia hodi gas air mata ne'ebe sosa ho osan mina husi Tasi Timor tiru Timor oan lubun ruma maka halo manifestasaun hodi defende direitu Timor Leste ba Tasi Timor.

Maibe ohin manifestasaun la'o ho dame no PNTL sira nafatin halo seguranca ba embaixada Australia. Iha ne'e manifestantes sira iha tempu liu husi sira nia porta voz Sixto hodi hamanas embaixador no fungsiunariu embaixada ne'ebe sulan aan iha embaixada Australia nia laran.

"Imi mai sai hanesan anju ida ba demokrasia maibe saida mak akontese katak imi la'os anju ba demokrasia, imi atan ba demokrasia, imi atan ba direitus umanus. Tan ba imi la hatene oin sa atu moris hanesan ema ida. Imi la'os anju ba demokrasia maibe imi diabu," sixto ko'alia liu husi loud speaker.

Nia hatutan, "Oin ami atu respeiya imi se imi mai la respeita ami. Tan ba ida ne'e ami mai iha ne'e atu hateten ba imi asaun hodiseik, ohin no ba oin ami sei hakilar nafatin too minute ida ba imi nia governu atu husu deskulpa ba povu Timor Leste. Ne'e atu hatudu ba imi kata kami matenek liu fali imi."

"To'o tempu ona atu povu Maubere ou povu Timor Leste atu hanorin imi kona ba saida maka demokrasia ne'e loloos. Ami iha obrigasaun, ami iha papel no iha solidaridade atu liberta imi husi hahalok ne'ebe maka hakarak invade, la respeita ema seluk nia dignidade no la respeita ema seluk nia soberania," sixto haktuir.

"Imi hatudu hahalok moe bo'ot, oin sa atu moris nu'udar uma no sai vijinu di'ak. Ohin lokraik ida ne'e ba imi hotu atu hateten ba kolega jornalista sira katak hodiseik noticia ne'ebe foo sai iha media internasional dehan hodiseik lokraik ami tuda fatuk ba embaixada Australia, ne'e bosok ten. Hafoin simu ho lian hakilar dehan bosok ten....bosok ten...bosok ten. Ba belun sira ne'ebe hasai informasaun sira ne'ebe la loos, ami kompriende imi nia kondisaun. Dala ruma governu Australia maka selu imi mas atu hateten katak ita sei la atan ba ema nia osan. Osan ne'ebe Governu Australia selu ba imi ne'e ita nia direitu. Ne'e mai husi osan mina nian. Osan Mina Timor nian no ne'e la'os osan husi sira nia avon nian. Ne'e ita nian, povu Timor nia osan."

"Problema sira nauk ita nia mina hodi ba faan iha fatin sira seluk hodi selu ekipamentus hodi mai Timor Leste liu husi fundus AusAid nian. Tan ba ida ne'e ohin lokraik ida ne'e atu hateten ba comunidade Timor Leste no mos comunidade internasional atu tau atensaun ho ema husi AusAid. AusAid ne'e katak ajencia espionazen ida ba rai hotu hotu."

Manifestantes sira simu ho basa liman no hakilar lian maka'as hodi dehan Australia naukten, Australia naukten, Australia naukten.

Hafoin Sizto kontinua deklarata katak husi ajencia ida ne'e maka sira aproveita atu mai sulan ita nia dignidade no lambe ita nia soberania nune'e ita bele dependent nafatin ba sira. Mas mai ita hetan ona no too ona tempu atu ita sai nain ba ita nia rain rasik, ita sai lider ba ita nia povu no la iha tan ema asing ida atu mai hanorin ita kona ba demokrasia. La iha tan ida maka atu mai hanorin ita kona ba direitus umanus.

Last modified on Sabadu, 07 Dezembru 2013 02:06